



Era quest onn, ils 24 da zercladur (17.00), organischa l'URC la festa da curtin tradiziunala tar la Lia Rumantscha. Tenor Patric Collet è quella festa «ina bun'ocasiun da vegnir en contact cun la famiglia rumantscha da Cuira».

FOTO MAD/URC

Unir ils Rumantschs da Cuira

Dapi l'onn 2020 han las Rumantschas ed ils Rumantschs da Cuira ina uniun rumantscha. Ses num è Uniun Rumantscha da Cuira (URC). Cun las pussaivladads da puspè pudair realisar dapli activitads suenter il temp da la pandemia, ha la suprastanza da la URC decidi da daventar pli activa e lantschar ina offensiva da communicaziun. Tant l'uniun sco er la gruppa da giu Rumantscholina duain daventar pli enconuschentas.

MARTIN GABRIEL/FMR

L'entira rait da contacts tranter Rumantschas e Rumantschs en la chapitala grischuna ha funcziunà durant blers decennis sin vias bilaterals. Ina da quellas vias era la Scolina Rumantscha a Cuira. Ils geniturs da la scolina rumantscha s'inscuntravan almain ina giada per onn ad ina festa en il curtin da la Lia Rumantscha. Dapi l'onn 1954 ha la Scolina Rumantscha gì ina funcziun existenziala per il rumantsch en la chapitala dal Grischun. La scolina vegniva manada da l'Uniun Scolina Rumantscha Cuira ed ils uffants frequentavan la scolina en las localitads da la Lia Rumantscha a la Via da la Plessur. L'Uniun Scolina Rumantscha Cuira ha en il decurs dals decennis era survegnì ina muntada politica a Cuira. Uschia è la citad da Cuira sa participada pli e pli da la Scolina Rumantscha. La citad ha integrà quella en sias localitads da scola, ed ha surprandi il bus da scolina. Dapi l'onn da scola 2001/2002 ha la citad perfin stgaffì la scola bilingua sin il stgalim primar en las chasas da scola Lachen e Barblan.

Trais incumbensas centralas

Dapi l'entschatta dal 2020 datti ussa l'Uniun Rumantscha da Cuira (URC) ch'è la successura da l'Uniun Scolina Rumantscha Cuira. President da l'URC è dapi quest onn il Surmiran *Patric Collet* che viva dapi onns cun sia famiglia a Cuira e ch'enconuscha fitg bain ils bassegns dals geniturs rumantschs da la chapitala grischuna. El ha numnadain sez uffants en la scolina bilingua ed en la scola bilingua. Envers la FMR di Patric Collet che la nova suprastanza da l'URC veglia tranter auter s'engaschar per la furmaziun dals uffants, ma er dar pais a l'inscunter da las Rumantschas ed als Rumantschs da Cuira. «Nus avain definì trais incumbensas centralas sco activitads da l'URC: L'emprima è dad unir la cuminanza rumantscha a Cuira e conturns. La segunda incumbensa è la furmaziun. La purschida rumantscha existenta a Cuira duai vegnir mantegnida e forsa perfin vegnir schlargiada en direcziun dal stgalim aut, secundar e real. Sco terza incumbensa vuleschan nus ans deditgar a la purschida da promoziun dals uffants che na van anc betg a scola.»

Per uffants a partir da trais onns

La gruppa da giu per uffants a partir da trais onns da l'Uniun Rumantscha da Cuira datti gia – la Rumantscholina. Patric Collet menziuna dentant che quella dovria anc in pau dapli marketing per evitar deficits finansials en l'avvegnir. «Jau hai l'impressiun che la purschida n'è anc betg propri enconuscenta. Bleras e blers tramettessan franc lur uffants en la



«Jau hai l'impressiun che la purschida n'è anc betg propri enconuscenta. Bleras e blers tramettessan per franc lur uffants en la gruppa da giuus, sch'els savessan da questa purschida.»

Patric Collet,
president Uniun Rumantscha
da Cuira

Patric Collet, il president da l'URC, è sin viadi per vegnir en contact cun las Rumantschas ed ils Rumantschs da Cuira.

FOTO MARTIN GABRIEL

norta, sch'els savessan da questa purschida. Nus avain planisà ussa mesiras da communicaziun per survegnir dapli uffants en la Rumantscholina.» La gruppa da giuè averta mintga mardi avantmezdi a partir da las 8.30–11.00 en il vegl Ospital Fontana a Cuira. La manadra da la gruppa ha frequentà ina scolaiziun per manar gruppas da giuus d'uffants en la vegliadetgna prescolara.

Pussibilitar l'inscunter

«A Cuira datti bleras Rumantschas e Rumantschs che n'èn betg organisads e na s'enconuschan betg e salidan per exempel per tudestg in l'auter», di Patric Collet, «pir cun vegnir en discurs percorschan ins ch'il visavi sa gea era rumantsch.» La URC vulesch dar la pussaivladad a las Rumantschas ed als Rumantschs da Cuira da vegnir en contact cun il rumantsch e da gidar da stgaffir novs contacts. La suprastanza da l'URC è tenor Patric Collet londervi da ponderar en tge furmas ch'ins pudess stgaffir quels contacts. «I fiss bain bel, sche uffants rumantschs da Cuira pudessan era discurren ru-

mantsch in cun l'auter cura ch'els en creschids e s'inscuntravan per exempel en sortida.»

Lia Rumantscha beneventa la fundaziun da l'URC

Il secretari general da la Lia Rumantscha, *Diego Deplazes* è fitg satisfatg che Patric Collet e sia suprastanza vulan rinforzar las activitads da l'URC. «L'engaschament da l'Uniun Rumantscha Cuira è zunt bainvegnì ed impurtant per segirar las purschidas da furmaziun rumantschas a Cuira», ha Diego Deplazes respundi a la dumonda da la FMR. La citad da Cuira che saja uffizialmain da lingua tudestga, na saja betg obligada da porscher ina scola rumantscha. Tant pli saja quai grondius ch'i dettia a Cuira ina vasta purschida da scola en lingua rumantscha. «L'URC è in bun exempel per autras cuminanze che la Lia Rumantscha accumpogna actualmain en differents citads da la Svizra.»

Dapli infurmaziuns davart l'Uniun Rumantscha da Cuira: www.urcuira.ch